

四明叢書

張宗祥



尙書講義目錄

卷一 虞書

堯典

卷二 虞書

舜典

卷三 虞書

大禹謨

卷四 虞書

皋陶謨

益稷

卷五 夏書

禹貢

甘誓

卷六 夏書

五子之歌

胤征

卷七 商書

湯誓

仲虺之誥

湯誥

伊訓

卷八 商書

太甲上

太甲中

太甲下

卷九 商書

咸有一德

盤庚上

盤庚中

盤庚下

卷十 商書

說命上

說命中

說命下

高宗彤日

西伯戡黎

微子

卷十一 周書

泰誓上

泰誓中

泰誓下

牧誓

武成

卷十二 周書

洪範

卷十三 周書

旅獒

金縢

大誥

微子之命

卷十四 周書

康誥

酒誥

梓材

卷十五 周書

召誥

洛誥

卷十六 周書

多士 無逸

卷十七 周書

君奭 蔡仲之命 多方

卷十八 周書

立政 周官 君陳

卷十九 周書

顧命 康王之誥 畢命

君牙 冏命

卷二十 周書

呂刑

文侯之命

費誓

秦誓

尚書講義卷六

朱鄆縣史 浩直翁撰

太康失邦昆弟五人須于洛汭作五子之歌

孟子曰民爲貴社稷次之君爲輕是故得乎丘民而爲天子太康失邦失其民也失其民者不可以爲君矣當是時五子怨以爲必歸須於洛汭愛兄之道也其如民之弗與何昆同也兄弟之同曰昆揚雄太玄經以昆首擬同人正此義也觀其作歌章雖異指如出一人則兄弟之同可知矣然五人弟也而謂之子

或曰子者男子之通稱非也方其御母以從稱子所以尊母也

五子之歌

太康尸位以逸豫滅厥德黎民咸貳乃盤遊無度畋于有洛之表十旬弗反有窮后羿因民弗忍距于河厥弟五人御其母以從僕于洛之汭五子咸怨述大禹之戒以作歌

尸主也夏諺曰吾何以休又曰吾何以助夏之民覲其君之逸豫如此至太康以逸豫主位遂至於失邦

何也蓋何以守位曰仁太康無德以堪之所謂不賢者雖有此不樂也是故其滅德也既不可比於先王觀其忘反也又不可以爲諸侯度無惑乎黎民之攜貳也夫遊畋以時使民聞車馬之音見羽旄之美無疾首蹙頰之告可也至於十旬之久皇皇無所赴愬民心從可知矣后羿何能爲哉因民之弗忍敢距於河然不曰民叛而曰弗忍有以見大禹之德涵濡漸漬入人之深雖後嗣不賢無卹我之心而猶弗忍叛也洛之南曰表洛之北曰汭五子之爲弟內奉其母

以猷其兄初無忿戾之辭詆其兄而傷其母之懷顧
乃上述先祖之戒自怨自責若己有過以求媚於民
庶幾民之悔禍以歸其兄使夏之宗廟社稷不淪胥
於后羿之手也卒之仲康之肇位繼以少康之中興
夏祀延茂垂數百年想其一時永言發於誠實故能
上動高穹而格先祖下風四海而感斯民斯民聞之
遠思萬世永賴之功近起是宜爲君之歎故其推戴
之心有加而無已也嗚呼孰謂五子之歌之爲怨詞
也哉

其一曰皇祖有訓

此章首述祖訓不曰先祖而曰皇祖解者曰皇大也君也或曰皇以道言其實皆尊大之義也五子者啓之子而禹之孫其言祖訓則禹之所爲也說者因禹不傳於賢而傳於子乃謂大道旣隱各子其子今觀其家所述之訓初無他說一於爲民則知當時禹固不私於啓也民與之天與之爾當呱呱之泣已有弗子之心孰謂旣長而以天下私之耶

民可近不可下民惟邦本本固邦寧

君之有邦履萬乘之尊據崇高之勢疑無事於民也然非眾則罔與守所謂邦者亦虛器爾果可不以民爲本耶是故木之植本盛則末茂民之歸本固則邦寧必然之理也禹唯知此故能以爲可近而親之以爲不可下而尊之親之則彼亦親我若父母尊之則彼亦尊我如天帝其本之固雖無繩約而不可解邦欲不寧得乎夫垂訓後人而首及於此可謂知所本矣

予視天下愚夫愚婦一能勝予

治天下之具莫大於賞罰喜有爵祿怒有斧鉞然而
不能以勝匹夫匹婦之愚何哉蓋天聰明自我民聰
明天明威自我民明威得其心和可格於造化俾其
欲變且至於乖離當是時雖有賞刑何所用之謂之
一能勝予非禹欺後世也雖然自下者人高之自後
者人先之後世子孫果能遵此以視其民民愛之而
不忍去是以不勝勝之實治天下之要術也

一人三失怨豈在明不見是圖

怨不可積怨固不在形之話言見之顏色深積於中

不可測度一旦土崩之勢瓦解之形芽蘖於朕兆雖有神禹且不能救此禹所以勤勤言之不能自己也後世子孫苟能及其不見而圖之使無滋蔓之難無噬臍之悔則天下可得而治矣

予臨兆民凜乎若朽索之馭六馬爲人上者柰何不敬凡言予者禹之自謂也方其託於兆民之上戰戰兢兢若以朽索而馭六馬前有蹶逸之慮而後有顛覆之虞其可一日安乎苟操是心以莅天下則無所不用其敬矣禹旣詳言民之可畏而其歸結在乎無所

不用其敬則所以訓其子孫者可謂切至矣昔仲弓問仁夫子對以使民如承祭祭敬也然則治天下而知敬民仁人之爲也後世有能如此皆足以爲治於天下豈惟夏之子孫可寶其訓乎仁人之言其利溥哉禹之謂也

其二曰訓有之內作色荒外作禽荒甘酒嗜音峻宇彫牆有一于此未或不亡

禹之垂訓如良醫之著書旣示之以衛生之術又戒之以致疾之由其所以遺後世者可謂詳且盡矣故

前章所引終始保民之說且曰爲人上者柰何不敬
此示以衛生之術者然也今其二章復列荒淫之目
且曰有一於此未或不亡此戒以致疾之由者然也
雖荒淫之事上古人君所無禹旣不得之於前聞又
不得之於親見安能逆知後世之必有是耶亦猶良
醫之治病當康平無事之日論其調養之乖宜知其
疾疢之必至當時有似不經後日無不合轍又豈待
人人切脈觀色而後得之耶惜乎此訓止爲妣氏家
傳之寶不得見其全書於後世也傳曰以身教者從